

西陲總統事畧

卷一之二

西陲總
統事略

西陲總統事畧序

伊犁爲西域總統之區自南北兩路戡定以來迄今
已閱五十餘載各城案牘日積悉關舊章特因紀載
未有成書每遇行查事件不免參差掛漏攷核無資
丙寅冬_筠曾有纂辦通志之請仰蒙
聖鑒以邊地書籍罕徵難於纂輯

特命館臣續纂西域同文志嗣是各城奉文查送事宜均
由伊犁彙總核轉款冊紛如昔嘗伏讀

高宗純皇帝御製文詩兩集又承乏西北數歷有年於邊事
見聞較悉因就彙核之暇檢前此汪知縣延楷原輯

未成之稿屬祁郎中韻士重加排纂一手編輯用叙
兵屯鎮撫之要邊防形勢之宜仍復親爲釐定並令
城守尉宗室賡寧爲繪輿圖書成凡十二卷自愧弇
陋少文不敢妄言志乘名曰伊犁總統事畧藏之衙
齋用備公餘省覽或於守土思職之義不無小補焉
嘉慶戊辰長夏松筠湘浦謹識

校刻西陲總統事畧序

吏部文選司員外郎程振甲撰

昔之人通大宛安息窮極之壤置校尉守之且戰且安輯之推其初心聞天馬葡萄以侈其疆而不思安撫之長策故任張騫班超而通其地任段禧任向而終漢之世不得與幕庭爭逞斯時山川疆索屯戍之利如龍門叙大宛蘭臺叙西陲著稱叛服無常羈縻之而已我

朝定鼎以來若土魯番哈密已入版章尋收伊犁定喀什噶爾等八大城哈喇哈什等十小城其地東起玉門西盡大宛南至于闐北迤西括康居之境環歷天山沿沂河源

皇威所屆悉郡悉邑其外宮以藩衛共球畢集重九譯而
來庭舉前代之荒遠難測可怡可愕者悉於衽席間見之
有河嶽之英生際其辰如我 湘浦先生者敷歷中外鎮
撫有年闢其田使速耕導其川使速漑百穀草木禽魚之
利無殊中俗又多良馬供驅策月日講詰戎之禮射生飲
飛注矢環甲旌燾一揮汗血千里鞭鞘所指屬國駿奔卡
倫之設嚴於桎梏而大將軍方且設庠序之教申之以三
物六德之燬與小民相更始欲胥殊俗而還乎淳且令人
我境者懷我好音極之大夏月支烏弋山離以西喁喁向
化暇則考山水方界之延袤與夫民情物俗政事之得失

各根其實都爲一卷凡十二卷是書也意繁而旨博於伊
犁安撫之長策尤三致意焉後之人守其土讀其書奉其
成法思其明德茂功與立言俱不朽若藏之名山則祁連
嵯峨四徹中繩爲積書之巖無疑也振甲與先生雅故同
在樞垣先生之督兩江也遣次子洪溥往謁出此書寄示
卽爲校刊且序其後

西陲總統事畧叙

伊犁爲準噶爾地卽漢之烏孫唐之突厥明之瓦剌也又曰綽羅斯今稱爲厄魯特與和碩特都爾伯特土爾扈特爲四衛拉特非若哈密土魯番巴里坤穆壘之久列藩衛也我

高宗純皇帝神威聖武恢擴遐方自乾隆二十年蕩平達瓦齊之亂始有其地是年阿睦爾撒納叛越二年將軍兆惠平之迄二十四年掃清回部南路八城增其式廓闢千古未闢之土實萬世無疆之休迺監於漢唐之陋設將軍於伊犁爲南北總統建城九調滿漢眷

兵六千置領隊大臣四屯鎮一撫民理事同知各一
勁旅碁布城郭星羅兵農並寓教養兼施聲教旁敷
無遠弗届大荒以西如哈薩克瓦哩蘇爾坦等咸知
沐浴

聖化駢集共球以視前代之徒事羈縻之術者恢乎遠矣
其間歷任將軍防邊之計各出經營柔遠之方悉有
建樹雖檔案可稽而掌收無次竊恐良法歷久而就
湮增損從心而勢異是總統事畧亟宜泐爲成書以
昭示來茲也嘉慶七年春松湘浦履斯任懷遠招攜
在在周摯養士練卒刻刻關心迺尋哈什闢里沁以

及濟爾噶朗博羅布爾諸河之源疏支導派灌漑屯田兵食豐盈夷民饒裕向之沙磧戈壁今皆爲樂土樂郊焉孔子謂善人教民七年可以卽戎湘浦治伊八年矣凡所爲竭力經營恪盡乃職者皆欽遵

聖明指示而行之不遺餘力所以貽旗屯回民之生計而資其樂利者誠公而溥大而遠故其諳悉邊情爲最深爰取歷任籌邊要道輯成總統事畧一書體備而事賅用周而政舉已巳夏余奉

命量移來伊方以任大事繁難以報稱爲慮途次適接湘浦寄示伊犁總統事畧十二卷於車中閱之凡山川

城郭土俗夷情治兵治屯撫夷鎮邊之要莫不井井有條燎如指掌允爲任斯土者所當奉爲圭臬也夫籌邊之道匪直空言鎮靜也開誠布公以浹洽夷情養精蓄銳以鼓勵將士宣威布德以推廣

皇仁至於邊境敕寧荒檄罔非臣僕旣富方穀甲冑亦曉詩書不皆爲固結之民安於磐石乎今湘浦之喀什噶爾叅贊任而猶惓惓於此者蓋不忍前人之良法或泯而畱爲將來之程式爾踵斯任者因時制宜斟酌盡善神而明之卽不必規規然盡爲求合而大綱要領詎能舍是而他求也哉是爲敘

晉

嘉慶十有四年歲次己巳六月上澣宗室晉昌謹撰

西陲總統事畧總目

卷一

初定伊犁紀事

初定回疆紀事

伊犁駐兵書始

伊犁興屯書始

卷二

南北兩路全境圖說

卷三

南北兩路疆域總叙

南北兩路山水總叙

南北兩路卡倫總叙

南北兩路軍台總目

卷四

官制兵額

兵書

自此以下至卡倫門專叙伊犁本境之事

職官題名

卷五

城池衙署

旗井

疆域山川

壇廟祠宇

糧餉 茶布

卷六

訓練

軍器

營務成案

卷七

兵屯 戶屯 水利

旗屯 水利

回屯 水利

屯務成案

卷八

錢法
銅鉛廠
煤廠

船工
壩工
木稅

圖籍

數學

世職

節孝

卷九

牧廠

廠務成案

卡倫

會議卡倫成案

卷十

塔爾巴哈台事畧

烏魯木齊所屬事畧

回疆各城事畧

卷十一

土爾扈特源流

哈薩克源流

布魯特源流